

四庫全書

集部

欽定四庫全書

集部

梅溪後集卷十七至十九

詳校官庶吉士臣翁樹培

主事臣呂雲棟覆勘

總校官進士臣朱鈐

校對官中書臣高中

謄錄監生臣陳文斗

欽定四庫全書

梅溪後集卷十七

宋 王十朋 撰

詩

戊子八月二日得泉州

五年符竹換三州
乞得祠宮欲少休
名姓誤蒙君相記
泉南千里又分憂

解舟

九月二十九日

解舟城之南橙橘半青黃時節豈不好胡為辭故鄉親
朋送我行殷勤餽壺觴我欲與之飲舟去留靡遑僮僕
別我歸黯然顏色傷問我何時還田園又成荒我心媿
其言老矣身皇皇五載走三州道路險且長屢請方得
祠暫歸又懷章挈家入南閩兒女不盡將餘生疾病多
滿鏡鬚髯蒼到官即有乞行將返耕桑

過瑞安

我家古樂成老未識安固偶把清源麾首問南塘路解

維日已晏入境天欲莫張子自陶山

子猷

扁舟惠然顧

沈君壯年別

敦謨

相見髮垂素訪舊多不存來觀莫知

數平原二十人邂逅喜相遇謂我宜少留欲款不腆具
我驅不敢疾曲為一宵住臨江有高閣登覽可以賦瀾
同孟子觀目作少陵注燈火照魚龍談笑驚鷗鷺銜盃
鄉意濃竊食君恩誤晨起酒未醒潮來報催渡

贈沈敦謨

三十年前硯席同懷人長在夢魂中徒勞州縣知何補

高蹈丘園不是窮歷問舊游多故鬼偶餘我輩亦衰翁
相逢又却忽忽別無復從容似泮宮

觀潮閣

高臨無地屹山腰今古知觀幾度潮水鑑掛空波正滿
鯨魚入穴浪還消雷初出地神龍怒銀忽成山海若驕
聖世風濤合平靜不應泛溢似唐朝

訪曹夢良

我自蕭峯下遙來訪許峯川塗何敢憚筆硯久相從故

里行將遠吾人豈易逢何當繼韓孟相逐似雲龍

鳳凰岩

鳳鳥久不至胡為於此藏德輝如可覽應不戀高岡

蕭家渡

渡頭問舟子此渡胡名蕭舟子笑荅我使君家匪遙豈
不聞侍郎名德重本朝屢為二千石兩至萬里橋渡旁
乃其宅人亡木惟喬陰德滿鄉閭嘉話傳魚樵江水流
有盡姓名磨不消近同池號謝遠類江稱姚叔顏謝舟

子講聞非一朝恨生晚且賤無繇際清標坡公不識范
韓子思之僑敬瞻通德門魂往不可招

入長溪境

老矣倦游宦入閩如山川三山疑隔海九嶺類鎖天

中峽

有鎖天
三里

種稻到山頂栽松侵日邊溪長水無盡前更有

清泉

贈程天祐秀才

程生嗜好與人殊杖履遙遙訪我廬不踏槐花隨舉子

手持醫國惠民書

宿飯溪驛

飯嶼飽曾見飯溪名始聞老懷如子美到處不忘君

樂清

有既
嶼山

門擁千峯翠溪無一點塵松風清入耳山月白隨人

宿雙岩寺

崎嶇九嶺更雙岩遙望閩山未見三來訪神鍾隱見處

翠微深鎖古精藍

至福唐會鄉人丁鎮叔張器先甄雲卿項用中
趙知錄薛主簿同年孫彥忠草酌試院

一同年友七鄉人勸酒那容耳不聞尚齒自驚多白髮

論文堪笑有紅裙

權師吳憲遣
官奴來侑酒

詩篇共約題孤嶼游宦

猶疑在五雲

彥忠會稽人予昔
仕越與彥忠友

此會此時寧易得明朝

風月兩州分

宿真隱寺

我亦欲真隱區區愧此身山林與城市何處隱非真

飯枕峯

門外峯如枕宜眠清淨身禪僧自面壁誰是枕峯人
飯罷忽忽別勞生可柰何不能留一宿有愧此峯多

宿囊山寺

荔子枝中古道場石門有路探懸囊忽忽不着游山屐

只辦蒿呼一瓣香

次日朝散
會慶聖節

秋來萬籟正號風壁上觀詩憶蔡公惟有秋林舊時月
夜深猶照梵王宮

過蔡端明故居

懷章南過蔡公鄉
駐馬遙瞻數仞牆
丹荔株株經品藻
喬松葉葉惠清涼
四賢詩出人增氣
三諫章成國有光
真是濟川三昧手
清源遊戲作虹梁

讌七邑宰

九重宵旰愛民深
令尹宜懷撫字心
今日黃堂一盃酒
慙慙端為庶民斟

送赴省諸先輩

國朝人物盛溫陵秋賦叨叨康食苹人倍平原門下士
三十文聯韓愈榜中名丹墀何止二千字雲翼行看九
萬程勸駕龍鍾老太守籃輿准擬出郊迎

次韵夔漕趙若拙見寄

去秋移郡近家鄉便殿狂言拜手敷何敢許身為稷契
偶因論事及堯湯民雖屢試如馮翊詔未能焚愧益昌
乞得祠宮養衰病夢中依舊坐黃堂

夔門邂逅恨忽忽君駕重來我已東陳迹徒勞長者記

若拙書六欲記
予去歲後數事

清樽那復故人同
光華持節花溪上

得報

若拙移
漕成都

老病分符佛國中

清源號
佛國

吾輩棲棲不黔突此

生休更問天公

知宗生日

士恭字
悅中

天工未放二陽生
留得堯階一萼
莫慶誕仙源貴公子
祥開南極老人星
日垂宮線添無盡
貌比莊椿看更清
歲歲華堂祝眉壽
笙歌聲裏雪梅馨

哭令人

三十年間共苦辛忽然驚斷夢中因鍾情正是我輩事
鼓缶忍同方外人熊膽未酬平昔志牛衣猶是向來貧
令人不蓄財瞑目 閩山滿眼同來路木落風號淚滿巾
之後囊索蕭然

貢院車水築基諸公懼傷魚鼈活之別治

塞沼增基大厦成羣鮮亦免校人烹洋洋圍圍諸公賜
要與吾君廣好生

出郊勸農

六年四郡勸農耕自欲歸耕尚未成游宦何如在家好

一塵從此願為氓

守臣憂國願年豐
半刺雙鳬此念同
安得時暘時雨若
有生均在泰和中

小麥含花大麥黃
一年春事已相將
籃輿遍入三精舍
撥得公家半日忙

一千石俸竊南州
老病餘生厭宦游
已上祠章即歸去
一犁烟雨事西疇

題靈秀峯禪院

小小精藍亦自奇一峯靈秀蘊幽姿
無緣細聽山僧話太守偷閒止片時

送九座訥老

禪老遙從九座來一言為我洗塵埃
飄然又向山中去白首相逢更幾回

至樂亭中半月留溪山杖履飽尋幽
見師忽起廬山夢夢向舊時游處游

崔肅之

雍

自湖至泉遷二親之喪歸塋詩以送

之

番水同僚舊遙從雲水來異鄉欣覲面清話洗銜哀

時予

有哭內之戚

葱鬱佳城就勤勞孝子回不應淹榷酤中外正

須才

夜聞子規痛念亡者

夢覺音容杳莫追子規聲裏涕霑衣催歸無計同歸去
耘後耕前事已非

南宮揭榜溫陵得人為盛提舶馬寺丞有詩贊

喜次韵

龍虎鄉邦地最靈
鯢鵬相繼上南溟
已聞元凱賓虞國
十六人行見淵騫冠
孔庭帝遣伏波持使節
天教平海會文星
鈴齋忽報捷音至
一炷清香千佛經

諸公廷對甫邇復用前韵

清源紫帽發英靈
萬斛詞源水注溟
遙想恩袍動草色
定知喜氣徹天庭
名高虎榜唐文傑
人半雲臺漢列星
累月笞兒幾翁姬
夜深燈火督窮經

次韵知宗春陰

行人怨雨農憂旱永叔元之事可明不歎花前無客飲
且欣郊外有農耕知公興已烟霞重顧我心尤勢利輕

天意稍佳民事急總將行樂付宗盟

東坡詩云斯人何似似春雨歌舞農

夫怨行旅君看永叔與元之坎軻一生遭謗語

次韵知宗游北山

州北有山幽更幽皇天閣雨為公游登高如入上下竺
宴坐疑臨大小湫掃地焚香烟縷嫋煎泉瀹茗乳花浮

觀詩起我家山興身在閩南夢在甌

悼亡

燕寢焚香老病身細君相對坐如賓而今一榻維摩室
唯與無言法喜親

不見音容忽三月無從涕泗已千行家山準擬欲歸隱
堪嘆相隨無孟光

偕老相期未及期回頭人事已成非逢春尚擬風光轉
過眼忽驚花片飛

黃緣偶作于飛侶夢寐相隨到數州泥上迹留鴻已去
舟中刻在劍難求

次韵知宗醑醕

萬斛虬珠眩眼明傲春遲吐冠園英詩因居士價方重
東坡武昌詩
為古今絕唱酒賜名臣花遂榮香異竹間吹細細韵如

堂上出盈盈醑醕號韵芳姿自可友蘭蕙惜不當時遇獨清

醑醕不載
于離騷

游承天寺後園登月臺贈潜老

三徑荒蕪未許尋
籃輿來訪小園林
因知燕寢凝香地
不似禪房花木深

月臺無屋有空壇
空處觀空眼界寬
不惹世間塵一點
冰輪心鏡兩團圓

送賈岩老還鄉

閩江艱險嶺崔巍
不憚衝寒冒雪來
留我鈴齋兩三月
扁舟載得義風回

堂上慈親數月違
片心遙逐白雲飛
傷心盡聽秭歸鳥

難弟言歸祔不歸

岩老聞祔歸
遂起歸興

乃翁賢德冠吾鄉伯氏聲名藹上庠更喜君如里曾子
少年孝義已非常

送岩老出北門

暮春送客北山門厭坐黃堂喜見村麥熟秧青農事急
十分歸興在田園

客欲東歸出北門又聞聯騎過西村慙慙為遣十從事
莫惜醉吟祔樹園

送傅興化

自得字
安道

五馬躬迎八十親，甘棠如舊治惟新。
歡傳此日來廉范，記得當時借寇恂。
江海聊淹把麾手，廟堂元是薦賢人。
送君為守泉南守，政拙才疎藉寶鄰。

曹夢良寄柑聞詩聞禮輩，取以祭母哭泣不已。
嘉果遙來自故鄉，去冬初熟記同嘗。
爾街懷橘無窮恨，我亦傳柑念不忘。

四月八日貢院上梁

廣廈初成萬柱標脩梁巍跨玉虹腰
況逢此日生千佛
定引羣仙上九霄
下筆蠶聲紛戰藝
出林鷺友競遷喬
清源人物從今盛
孝子忠臣滿聖朝

諸公和詩復用前韵

脩梁欲舉綵先標
聲撼春雷鼓百腰
谿蟄蛟龍欣得雨
去年西溪龍見
上梁日得雨
桐棲鸞鳳合冲霄
桐城清源水接南溟濶

紫帽山齊泰嶽喬
學不負人宜自勉
前賢勲業著三朝

曾魯公
相三朝

梁脊連年姓誤標兩州騷客瘦吟腰月河月滿燕賀厦

雲川貢院十二月望日上
梁郡有月河在貢院左

佛國佛生虹掛霄多士顏歡

歌杜老一輪香滿賦張喬此途不止為科第名節崔巍

看立朝

悼亡

傷哉無復見老矣不成偕牢落凝香地同誰話此懷
相勉惟清白囊如四壁空難忘將絕語勸我莫言窮
予

日忽言窮令人曰君今勝作書會時矣
不必言窮予悅其言蓋死之前數日也

梅溪後集

薛士昭主管母夫人加封送酒為壽薛有詩謝

次韵以酬

伯宣

慶事公家奕世傳生封錦告出甘泉榮親行有千鍾祿
為壽慚無百斛船喜氣在顏窺貴客清風滿枕扇高眠
朝廷指日先封薛歸侍萱堂冕有蟬

送吳憲知叔

出郊聞好語盡道憲車賢郡不留三宿人皆仰二天薦

章先白屋

公至郡薦三人皆孤寒士

貢字給青錢

以百緡助起貢院

上正開

宣室公歸席定前

祈雨未應提舶知
宗道觀焚香明日
遂雨提舶
有詩次韵

一雨誰之力因公發善心
同為上公請小作傳
岩霖高廩行將實南風
日已駸涓辰祈善利
感應亦猶今

次韵知宗賀雨

雲飛初類愈隨郊
珠忽跳空室舞蛟
但願農多大田稼
不愁風捲少陵茅
是夕大風
才疎政事由來拙
天遠精誠未

易交三日禱祈纔一雨自知無處避謳嘲

次韵陸倕賀雨

潘字次川

目注雲霓為國憂何心肥馬更輕裘庶民愁恨旱無雨
三日滂沱農有秋且喜上公容我請不辭大白共君浮
人言太守無才術端藉士龍監此州

夏四月不雨守臣不職之罪也將有請于神雨
忽大作陳賀州有詩贊喜次韵

不是尋常喜雨詩言存軌物類臧僖

賀州詩序 闕
花迎

巫呼舞之非真有軌物之言也相將歸賀天朝雨定有忠言結

闕

樂白

天以賀雨詩諷諫東坡詩云賀雨詩成闕諫書

郡人方切望雲霓忽見高田水入低正好歸田飽黃犢
不須騎馬聽朝鷄

賀州賀雨句如何不減夔州夢得歌

陳詩序云聞竹枝闕

更有

一犁江上曲它年傳誦到金坡

政拙年年厭禱祈心香一炷逐雲飛老農問我何良苦
薄有田園胡不歸

刺桐抽葉張青蓋

泉人以刺桐先葉後花為豐年兆

紫帽蒙霞麗錦籠

俗謂朝霞暮雨前日雨作朝果有霞

今歲家家定高廩多苗寧復羨渠儂

次韵蔣教授喜雨

雖字元肅

我來遙自東甌東賢非朱邑鄉守桐

泉方洞城

半年為郡治

亡狀四月不雨心憂農水田龜拆秧已老雲霓望斷天

穹隆少學春秋老欲用區區願請應上公真人不待辨

香禱

泉有蔡真人祠水旱必專

紫帽已有微雲蒙沛然一雨四境足

眼見擺極青連空皇天愛民恕守罪有始其賜寧無終

既令地免晉國赤亦不水似元時洪廣文先生坐絳帳
憂國心與黃堂同揮毫作頌繼吉甫開卷穆穆生清風
知宗游延福有詩見懷次韵以酬

向來雲榭倚闌干興已遙馳山外山風伯如嫌俗駕至
禪房疑為病夫關鈴齋倦卧眼界寂詩社免陪心境閒
蠟屐何時破吾願與君舒嘯翠微間

提舉延福祈風道中有作次韵

雨初欲乞下俄沛風不待祈來已薰瑞氣遙看騰紫帽

豐年行見割黃雲大商航海蹈萬死遠物輸官被八垠
賴有舶臺賢使者端能薄斂體吾君

病中食火山荔枝

前年夔州食荔枝同僚共賦

闕

紅詩妃子名園世所貴

不似詩史堂前奇去冬分符

闕

南士半月身行荔枝圃

三州嘉木皆眼見更閱君謨向來譜臨漳一種名火山
品雖云下熟則先從今漸入荔枝佳境陳江未擘先流涎
老病餘生怯嘉果日啗那能三百顆慙慙為破絳紗囊

心火驚添火山火

諸公和詩再用前韵

屏間觀畫頤頻支

州宅有屏風畫
荔枝十六種

想像風味哦新詩火

山太早反遭罵

諸公和詩
多幾罵者

陳紫未顯誰稱奇氣稟南方

君子士不近長安帝王圃安排名字知何人誤與牡丹

同入譜泉南老守思故山荔枝熟我去誰後先但願丁香

一株熟添入藥裏瘥瘥平生夢寐南州果瘦腹如蟬

消幾顆明年何處飮杯盤鴈蕩山前月流火

永嘉七月
方食荔枝

漳州石教授寄火山荔枝

炎方摘實走筠籠
千顆遙遙寄病翁
未啗吾州法石白
且嘗鄰郡火山紅
攬先趁得楊盧雨
珍重來從芹藻宮
我欲細論香色味
一尊何日廣文同

東湖小飲

微涼散梅潤濃綠
敷桐陰送客出東郊
駕言事幽尋湖
光照我眼荷香清我襟
平疇入遠望歲有其自
今牛眠
種已畢蛤吠苗初深
古亭懷二公遙望羅千岑
邂逅得

良友欣然契予心
喬松喜客來風枝出清音
手持荷葉杯共對蓮花斟
東湖異西湖有詩不妨吟

東湖

二公亭插芰荷間
綠蓋紅粧四面環
若把西湖比西子
東湖自合比東山

愛松堂

炎炎畏日愛濃陰
穆穆清風愛好音
不獨愛松兼愛竹

此君亦有歲寒心

松之西
有竹

食瓜呈知宗

荔子勞民疏伯游
蒲萄釀酒博涼州
何人傳得東陵種
大勝家封萬戶侯

題節推納涼軒

孔光字德薄

有客游蓮幕開軒
更傍蓮披襟風未
賦遞嘯句先聯境
淨涼偏乏心清暑
自蠲快哉誰與共
廣厦集羣仙

軒近貢院

州宅即事

泉南古州宅草木
有遺芳鷹爪冬猶
綠閣提夜更香佛

桑朝暮異荔子歲年長惟有松并竹青青似故鄉

修鷹爪花架

有花藤蔓生封植傍州宅狀類鷲禽爪葉作翻風翻酸
分含笑香黃帶蒼葡萄色架倒吾為扶清涼納朝夕

鷹爪花

誰把名鷹爪天然狀不殊無心事搏擊中有鳥相呼

長生草

草有長生者無根葉自抽秦王不知此誤向海山求

榕木

南國有喬木老非梁棟材清陰可以覆亦足報栽培

安靜堂

前賢治迹尚堪尋
留得堂名直至今
若欲斯民盡安靜
要須安靜自家心

中和堂

堂前老木幾經春
徧閱泉南舊守臣
盡向中和堂上坐
中和為治有何人

雲榭

山生取地榭侵雲土木多應役鬼神好向危欄高着眼
閭閻無限困窮人

二山亭

連年行役厭間關踏遍千山見二山欲識泉南山面目
羣山忽在一亭間

清暑堂

後復名
忠獻

九夏炎方氣鬱蒸沉沉廣廈有涼生仁風未慰黎民意

何忍堂中暑獨清

貢院納涼分韵得湖字

突兀千間屋清涼五月湖人才此塗出暑氣坐中無虎
榜唐文傑雄風楚大夫相期游廣厦慷慨論唐虞

知宗游東湖用貢院納涼韵見寄次韵奉酬

東湖曾一到想像賀家湖花似越女好人如狂客無

知宗

寄居會稽

高吟還老手野趣屬潛夫歸奏南風曲薰兮欲和

虞

再和

宗老呼佳客同觀郭外湖融樽常喜滿參酒不言無

知宗

二子侍行

草色懷三徑松聲憶五夫

越州五夫因秦封五松得名

公游更

何日旌至定招虞

比和知宗詩牽於押韵以招虞為戲果蒙見招
復用前韵

宗英真好事呼客共游湖携具臨平遠觀山對有無十

花逢淨友

曾端伯十花以荷為淨友

千頃和雲夫

韓詩酬盧雲夫荷花行曲江千頃波

淨得玉又求劍無厭慚似虞

游湖值雨薛士昭衣巾霑濕意氣自若戲用前

韵

薛侯真不俗十日兩東湖俊逸詩篇有倉皇雨具無袍
雖濕毅父眉不皺堯夫異夕月離畢游宜脩不虞

次韵知宗游二公亭

前日同登二山亭清源入望清更清宗英載酒挾兩客
破暑共作城東行東湖未到聞人說香有荷華如鄭隰

社中未為三笑游亭上姑尋二公跡銜杯適意論交情
江山照眼增雙明聊效韓公文字飲奚用鼎沸笙簧聲
提舶示觀楚東集用張安國韵因思番陽興唱
酬者五人今六年矣陳何二公已物故餘亦離
索為之慨然復用元韵

憶昔江東會衆仙詩筒來往走山川

時陳在豫章何按
屬郡詩筒常往來

造樓游戲偶成鳳煉石辛勤同補天堪嘆交游隔生死
尚餘文字帶芳鮮欲收膏馥增前集舶使新詩自合編

五月晦日會知宗提舶通判納涼雲榭提舶用
仙字韵即席賦詩中寓四字次韵以酬

雲榭銜杯半八仙却疑來自蜀山川地如洙泗占高第
人似羲和分昊天單騎聯翩成駟馬杯羹淡薄從三鮮
國風雅頌寂寥久太史採詩宜與編

知宗提舶即席贈詩用元韵以酬并簡通判

子政堂堂漢列仙清標况對馬文淵

代州字

催詩風送千

山雨把酒涼生五月天老子濫分南郡竹貳車行擊故

家鮮

通判將美解

誤蒙好語相提拂豈有功名上簡編

提舶欲移厨過雲榭示詩次韵

雨中前日過蘓端又欲移厨就稍寬古榭有風聊可共
衰顏得酒定須丹謫仙醉後句尤勁東野老來詩更寒
繼取洛中率真會他年要作畫圖看

提舶携具過雲榭知宗示和章復用韵

不須蠟屐上林端高處登臨眼自寬擺極風翻梅裏白

稻最早者農家目為梅裏白

離支日照鶴頭丹山川滿目如京洛臺

榭侵雲類廣寒賓主往來俱不遠如棠不比魯侯觀

老來憂患苦無端一笑相逢強自寬詩律頻調代音樂

壽觴滿引當仙丹二山坐對事非偶

二山一名朋山與賤名偶同

三

徑思歸盟不寒出岫白雲知幾許榭中矯首共遐觀

知宗即席和端字韵三首提舶退即足之予第

三詩經夕方和錄呈二家

筆禿中山硯滌端社中詩令不容寬難追老杜風騷手

徒費昌黎點勘丹搜我枯腸鬚鬢皓吟公佳句齒牙寒

自慙淺陋如曹鄴季子觀風定不觀

傅興化送蔡端明集報以溫公文因求端明帖

迂叟遺文整頓初寄君聊當報瓊琚南鄰尚有無厭意

更覓皇朝第一書

東坡謂君謨書
為本朝第一

陳賀州速客送酒

賀州呼客細論文我欲相過與共論正恐俗他真率會
不如分去聖賢樽簪當濃綠畫中盃杯向輕紅擘處翻
即席有詩應寄我敲門來送月黃昏

丁惠安贈肉蓯蓉

康臣字道濟

老子當歸興已濃
今君何事寄蓯蓉
行將卜築前湖去

蓯笠牽牛作老農

往年同泛舟城南有卜築之意

梅溪後集卷十七

欽定四庫全書

梅溪後集卷十八

宋 王十朋 撰

詩

修戒石

曩在夔府修戒石作柏梁體今郡庭戒石痺陋葺而
新之貢院會同官以夔府前四句分韻得爾字

君以民脂膏祿爾大丈夫脂膏飽其腹曾不念赤子貪

暴以自誅誅求不知耻指呼有鷹犬嗜慾肆蛇豕但言
民至愚孰謂天在邇昭然甚可畏殃必反乎爾聖訓十
有六簡嚴具天理大字刻山骨朝夕臨坐起一念苟或
違方寸寧不媿清源庭中石整頓自今始何敢警同僚
兢兢惟勅已

知宗送玉友酒

鈴齋晝寢夢初醒忽見雙嬰眼欲驚誰送瓮頭新玉友
人言天上老宗英

林漕世傳贈莆中荔子名狀元紅分送陸倕陸

倕有詩次韻

林名孝澤

譜中不見見屏中

州定荔支屏風中有此名蔡譜無之

正與花王雅目同

牡丹亦

有此名別駕破荒吟好句少陵詩裏摩輕紅

提舶送荔支借用前韻

船臺丹荔新秋熟風味如人自不同名字未安真缺典

從今呼作馬家紅

舊已有名馬家綠者

州治有忠獻堂以韓魏公始生得名廢於俗吏

更以清暑今復之

相出相州生此州巍巍勲業宋伊周後人莫要輕更改
別有堂名勝此不

六月二十五日會同官于貢院用前一絕分韻
得相字

天作元聖配

東坡祭公文天生元聖必作之配

公非淺夫相

荆公詩骨相知非淺

大乘風來帝旁捧日到天上兵我在呼吸端委見力量

三朝社稷臣勲業誰輩行堂堂國伊周勃輩安敢望
歷

聖德詩可屬上
事重厚如勃

清源始生地風土至今王釋氏從何得

抱送真不妄

事具行狀

好事榜其堂嘉名無以尚何人輒更

改有識為悽愴端同聖削迹又類玄覆醬思賢舊觀復

聞風懦夫壯堂上生輝光如公名始唱

公唱名時日有五色

姦骨

死猶寒如公昔為將畫象出貂蟬疑公尚亡恙平生夢

我心眷此應不忘嗟予生太晚不識天人狀版首猶未

復書錦無由訪維揚金繫腰歎息為誰放一麾忽南來

遺迹增慕嚮當於異夢處祠堂為公創

公生時母有異夢

新第先歸者五人燕于黃堂故事也酒半啜茶
于忠獻堂持盃以勸即席贈詩

四海英才入網羅清源龍虎姓名多經魁蘭省得人傑
策射楓庭收甲科奎宿呈祥前未見緯星還舍首相過
一杯忠獻堂中酒名節相期要不磨

寫真自題

顏蒼白髮少精神傳得泉南老病身莫著金章著蓑笠
丹青寫出更須真

士昭贈寸金魚子

三印子魚猶未食寸金魚子輒先嘗鄉人得得分鄉味
轉使鄉心念故鄉

贈第二人石察判

起宗

策冠諸儒已奏聞不妨居次避平津坐看萬石門開大
策冠諸儒已奏聞不妨居次避平津坐看萬石門開大

居弟
石坊

轉覺朋山氣象新黃卷更窮稽古力青雲莫負致

君身試觀忠獻堂中像亦是當時第二人

荔支七絕

陳紫

端明品第首推陳花裏姚黃是等倫郡園一株稱小紫

故家風味自宜珍

興化所送及郡園所生者皆小紫也

江綠

枝頭已熟疑非熟蔡譜江家綠荔枝真與泉南人物稱

果中猶作亞魁推

泉州自龍虎榜以來多出第
二人江綠在譜中為第二

皺玉

莆中皺玉價傾城品第吾何敢妄評只恐此非真皺玉

果然是玉亦虛名

大將軍

荔支名字太紛紛所見多應不逮聞別有深紅霸羣品

郡人呼作大將軍

郡園荔支以
大將軍為冠

玉堂紅

天教尤物產閩中名字深奇日不同顧我素稱田舍子
如何敢啗玉堂紅

奪先紅

林園正處見贈因以
訓之林嘗觀別頭

閨中荔子說莆中闕下奇色又不同正向鈴齋想風味
奪先人送奪先紅

七夕紅

宅堂荔子無名字自我呼為七夕紅記得去冬初到日
家人指樹語衰翁

貢院垂成雙蓮呈瑞因成鄙語勉士子

大夏垂垂就嘉蓮得得開雙雙戴千物兩兩應三台

南泉

雙蓮凡
三問矣

歡意重重合香風比比來人人宜自勉舉舉有

廷魁

梁魁登第泮宮
有雙蓮之瑞

陳賀州賦雙蓮詩不言祥瑞次韻以酬

紅蕖明鏡兩鮮鮮中有雙頭更潁然天產人才兼產物

公祥和氣不祥蓮耻談子厚表中瑞肯詠章安橋畔篇

何日相呼登泰華采華食實藕如船

楊公濟永嘉雙蓮
橋詩云昨日米蓮

者雙雙橋畔新舊花今不見
喜見似花人楊集號章安

郡圃有荔支名白蜜者熟最晚戲成一絕

紛紛蜂采百花歸蜜在枝頭竟不知造物要令甜在後

時人莫訝熟何遲

送王提幹

澆

昔年王儉客今共阿戎游
嘗藥子當去請祠予欲休
過從都幾日離別况逢秋
歸上雙親壽筵中莫逗留

觀貢院畫春景圖

梁棟翬飛氣象新
畫工妙思亦通神
要令寒士皆春色
四景之中獨畫春

韓魏公生于泉南州宅故未有祠於典為闕郡

園有庵名大隱即之以祠八月戊子率同僚祠之

天開我宋太平基紫府真入下應期河朔魁梧出真相
泉南蔥鬱產奇兒夢符蚌腹生珠夜事應台躔捧日時
紫帽清源發光采郡園深處立新祠

陳提刑永仲以清名室志先德也詩以美之

名孝

則

龐公嘗有言我獨遺以清賢者於子孫所遺良不輕賴

川老龍公落落前朝英帝命作南伯清德如廣平宸翰
一字褒不啻華袞榮是以自賢孫持節蜚英聲結廬桐
城隅室以清為名仰不忝厥祖俯能規後生我來聚星
地喜見此老成公清不自言藹然著鄉評時焉訪其室
鄙吝不敢萌如覲任棠水似濯滄浪纓願移清室風于
以清褰瀛

撲鄉釣隱圖

蔣元叔名所居之地曰朴
鄉畫圖見示為作是詩

君不見少陵先生詩有說淳朴之處山川別廣文示我

朴鄉圖山水高長景奇絕巖坂疑為子陵隱昆溪想自
崑崙決漁人歎乃山水間抱璞含淳釣清潔九仙高舉
留遺躅三徑名家出人傑早將朴直取巍科行展朴忠
立奇節鳴琴百里邑既以朴化民橫經泮水宮又以朴
誨人他年致君堯舜上坐使風俗俱還淳功成名遂却
歸去漁釣重尋舊隱淪廣文笑我言公朴甚我朴聞公
家左原四面擁山岳迴隱如愚溪窈深若盤谷人皆朴
其貌公又朴其學君子以為古先進於禮樂公鄉真朴

鄉胡為不自覺願公著隱服歸尋舊盤旋酌酒梅溪上
把釣蓴湖邊更畫左原山水圖與此朴鄉圖並傳天下
大朴散已久二鄉猶在羲皇前

八月十五日貢院落成賓僚咸集斥世俗之樂
不用飲文字也把盃邀月誦香滿一輪中句即
席賦詩以勉多士

揚輝秋月懸青天今夕何夕光更圓瓊為樓臺玉為宇
廣寒境界移清泉月斧雲斤天上手萬間突兀摩星斗

白頭郡守呼衆賓共飲落成文字酒龍虎羣仙上界還
手移桂種栽泉山千枝萬枝香不斷人人有分行當攀
姮娥慇懃寄消息科第要從勤苦得丹桂在君書卷中
不須遙向蟾宮覓

送薛士昭

相逢一笑慰衰遲問政論交兩不疑直諒多聞三益友
清新俊逸百篇詩瓜猶未及去何速橘已成懷喜可知
一薛居州非易得危言行見造朝時

記得祥符識面時
回頭二十二年非
美君學似川方至
顧我身如鳥倦飛
老境天教重會合
異鄉心最惜分違
雁山親舊如相問
征雁歸時我亦歸

愛松堂前有綠竹
一叢可愛旁有鷹
爪花頗碍
眼移去之

憲前栽植不宜繁
松竹相依妙意存
不許閒花放鷹爪
要看高節迸龍孫

提舶送菊酒有詩次韻

鈴齋午睡夢魂驚
僮僕歡呼洗破觥
酒是爛柯山下法
詩如藍水坐間成
謾同陶令浮黃菊
也勝蘇仙嗅落英
蓬鬢蕭疎對佳節
因公撩起故鄉情

九日登雲榭

九日無悰懶出關
強登雲榭望泉山
傷心不忍看茱菊
蓬鬢蕭疎淚點班

十日同知宗提舶游九日山延福寺

十日同游九日山
山中好處畧躋攀
桑田改變松猶在

車馬往來心自閒昨日風應吹紫帽今朝菊已帶衰顏
登臨稱愜南來意好逐飛飛倦鳥還

御書閣

黃龍溪上祥雲覆紫帽山頭瑞氣蒙俗眼驚傳佛光現
不知宸翰在山中

思古堂

孤嶼游人思謝公天台禪客亦思豐

國清有思豐堂

黃花境界

誰思古堂在烟霞縹緲中

善利王廟

有德於民廟貌崇
我來端為謝年豐
曰暘曰雨皆神力
不止南風與北風

晉時松

孤山陳柏已物化
九日晉松猶後生
欲問東南兩朝事
風枝瀟灑侶談清

秦君亭

山中高隱欲逃名
不謂名隨隱處成
鑿石一泓詩數首

也曾攻破五言城

姜相峯

相國忠如宋廣平危言流落晉江城天資自直無心賣

何事青山亦得名

明皇謂宋璟德宗謂姜相皆有賣直取名之語

無名木

一木蒼然老更奇肯將名與世人知我來不具知名眼

深愧平生不學詩

姜秦峯

舊在延福寺中後易之立前守生祠而遷其像於西山石佛之下前守乃毀忠

獻堂
額者

郡侯不識國元勲
釋子那知姜與秦
隱士有靈應撫掌
相公死亦不容身

陳公祠

名 偶字
君舉

九年地主百年祠
民自元豐結去思
善政在人宜有後
堂堂忠肅見公兒

蔡端明詩

賢侯去久迹猶遺
乞雨詩奇字更奇
世俗妄論公政猛

愛民心有彼蒼知

石佛

卧草埋雲不記秋忽然成佛坐岩幽紛紛香火來求福
不悟前時是石頭

聚秀閣

清源山遠水流長九日溪山更異常高閣摩雲聚秀氣
禪僧秀氣聚中藏

提舶送岩桂

晉堂岩桂晚秋芳濃綠枝頭萬粟黃堂上主人分贈我
要令燕寢有天香

寄南安鹿宰

何字
伯奇

予比至延福訪姜相祠則遷于他所問姜相墓則曰
不知也以語南安宰鹿君越數日南安見訪云祠已
復舊墓亦得之且修治矣惟秦君亭未葺蔡端明詩
將與薜俱圯而不知護因寄南安

春秋重復古二賢還舊祠直道不終廢高風宜見思古

墓出荆榛孤亭起顏隲更將碧紗籠覆護端明詩

貢院圖

鄧推陳德溥董貢院之後
既成畫圖見示因作是詩

陳君少年登甲科紅蓮首泛清源波清源貢宇高差我同
僚宣力陳君多鞭朴不施成不日首夏上梁秋半畢
一點靈臺輪奐飛十幅生綃畫圖出蒼蒼嘉木森千株
新堤步步穿芙蓉移下蟾宮古丹桂桂種飛來海上真蓬
壺他年君來作地主記得親曾視斤斧雁過山中寄我
書要知多少新龍虎

去年

去年今日別吾家我鬢蒼然爾未華
日侶去年人不見
鬢毛白盡眼添花

不求人

一名如意

牙為指爪木為身搔痒工夫侶有神
老病不能親把握
不求人又却求人

興化簿葉思文吾鄉老先生也比
泂檄見訪既
別寄詩二十八韻次韻以酬

莫年初仕塗暇日但書策儒生餘氣習筆端事揮斥政
學兩疎繆篇章稍沉溺楚東會詩豪酬唱奏金石逢場
爭出奇遇險或遭厄忽泝三峽流遙經數州驛廬山看
未足巫峯過尤惜西郊祠卧龍東屯弔詩伯飛飛猶倦
鳥秋風送歸翮同行得嘉友鏖戰交鋒鏑弛檐白蘋洲
天日去咫尺忠誼懷魯公霸業悲項籍湖州設廳舊祠項羽奉詔
還故鄉齒落肌瘦瘠涕泗拜松楸荒蕪翦荆棘心期樂
田里擔不綰銅墨橐雖無陸金歸幸全趙璧陛下忽誤

恩泉南又分職入閩如入蜀枯腸復冥索腰緣病減圍
髮為悲添白風仰秦君高節慕姜相直惡語誰流傳同
僚誤刊刻吾鄉老先生吏事以儒飾新篇似庭燎遠寄
箴我癖把酒欲細論何時再公檄陽春七十首老豔萬
夫射招邀屈原魂收召子厚魄驚開老病眼喜見墨妙
蹟願公倡斯文用夏變蠻貊

近世作詩文者多溺於
異端之學惟恃鄭先生痛

萃其
猷

送陸通判

劇郡元非老手便庶民安我貳車賢二年不肯足到邑
千里寧容吏索錢坐變池塘成貢字平分風月上吟篇
弟兄不減雲間陸拭目看君日九遷

我十年前游會稽堂名民事寓招提去尋神禹藏書穴
歸汴子猷乘興溪萬壑千岩形夢寐十峯雙澗記留題
鑑湖倘許知章乞首訪故人尊共携

觀郡守題名

春秋美惡不嫌同老子韓非一傳中壁上題名二百輩

卓然名世兩三公

龍眼

絕品輕紅掃地無紛紛萬木以龍呼實如益智本非藥
味比荔枝真是奴

金橘

黃柑綠橘未分珍瑣碎登盤輒獻新正可呼為木奴子
不知誰是鑄金人

清源夫人趙氏挽詞

全節忠臣配崇寧宰相家哀能變國俗貴不御鉉華學
佛窮三昧然松教五車遺芳載彤管名壽兩俱遐

我竊清源祿欽聞孟母慈符分三子舍桂擢兩孫枝方
戲黃堂綵俄豐紫帽碑神州嗟未復長抱望夫悲

食薑

棘皺人翁性最良藥中功效不尋常吾儕自是生無智
夫子何曾食徹薑

食芋

我與瓜蔬味最宜南來喜見大蹲鴟歸與傳取東坡法
糝玉為羹且療饑

夢二叔

二叔年皆八十餘經年不見久無書江山不隔還鄉夢
昨夜迢迢到佛廬

懷胡侍郎邦衡

今世汲長孺廬陵胡侍郎孤忠一封事千載兩剛腸晚
節逢明主丹心契上蒼羣兒巧相中直道亦何傷

悼汪舍人養源

襤被周廬日黃緣識偉人

庚辰同
考殿試

節因辭辟著志向得

言伸伯仲同持橐聲名歷縉紳人亡邦國瘁可贖百其身

悼張舍人安國

天上張才子少年觀國光高名一枝桂遺愛六州崇出世纔成佛修文遽作郎長沙屈賈誼宣室竟淒涼

黃花

溫陵地雖溫十月初黃花天然傲霜性炎威莫能加不
趁重陽摘自愛晚節嘉宦游胡不歸三徑荒吾家

飛蚊

九月不肅霜十月猶飛蚊不知從何來乘昏動成羣背
利巧能嘅類多非可熏青蠅與白鳥自古常紛紛

夫子泉

君不見水經品第天下水康王谷中泉第一但知取水
不取人品第未容無得失又不見武昌山中清冷淵名

因人重逢蘇仙至今人呼作菩薩淪入異教非吾泉刺
桐城中泮宮裏大成殿下新泉水不須更以品第論混
混源流自夫子諸生游泳芹藻間日飲一瓢心慕顏聰
明不數遠公社

廬山蓮社
有聰明泉

清白大勝卧龍山

越州卧龍
山下有清

白泉范文
正公名

聖毓尼丘家闕里泉脉胡為今在是周流天

下皆美泉浚井得之泉更美我來酌泉仍叩頭遐想洙
泗三千游世間何處有此水此州無愧名泉州

立高桂坊

書生未折桂，短檠事然膏。一朝桂入手，不記燈窗勞。回
視紙上語，棄置等弁髦。曲學如公孫，高第何足褒。溫陵
號多士，啾啾食苹蒿。臚唱十年間，魁亞出二豪。向來此
坊中，一門五夢刀。月中仙子歸，天香滿藍袍。大對歷晁
董，同登盡劉曹。嘉名換扁榜，鐵畫新揮毫。我欲成其美，
遠大期伊臯。桂高固可喜，更看名節高。

洛陽橋

北望中原萬里遥，南來喜見洛陽橋。人行跨海金鼉背，

亭壓橫空玉螭腰功不自成因砥柱

中流有
岩石

患宜預備

有風潮

紹興戊午嘗為
颶風暴雨所壞

蔡公力量真剛者遺愛勝於鄭

國僑

移庖貢院知宗即席賦詩次韻

預讀嘉賓小雅章銀袍行見鷺成行彬彬周室士升俊
濟濟禹庭言拜昌落筆詞源俱倒水何人觜距獨專場

退之詩子時
專場觜距

清源欲志新人物定有英才副所望

知宗贈金桔報以香橙

桔以金為重橙因香見奇拜嘉欣孰早報貺愧來遲好
處君須記良天我正思

魏野詩云南客
應思桔柚天

聊修往來好更

誦木瓜詩

梅溪後集卷十八

欽定四庫全書

梅溪後集卷十九

宋 王十朋 撰

詩

乞祠不允三十韻

微臣守清源一歲三乞祠俞音竟未拜感荷聖主慈臣
家素賤貧仰祿救啼饑區區六年間手把四郡麾道途
厭奔走囊橐無餘貲清源乃佳郡風俗不待移民淳

簡獄訟士盛敦書詩地遠可藏拙祿厚足自資今歲又
豐登千里人熙熙臣豈不願仕求閒欲奚為自憐螻蟻
生福薄命最奇入境身即病到官日呼醫痰涎每上攻
旋暈勢甚危藥試何止百灼艾無全肌臂疼如子美齒
落如退之脚患柳州腫髮垂孟郊絲飲食日減少跬步
須扶持殘喘雖尚延定非久遠期況臣糟糠妻蓋棺將
及期旅櫬猶未還兒女晝夜悲臣今官滿考臣去有二
宜孰謂九重遠天高而聽卑吾君不之告肝膽將誰

披廟堂二三公誤辱平日知今不憐向隅恩復何時施
願於黼辰前敷奏迫切詞天日臨在上臣言非敢欺解
官食祠祿曲遂臣之移幽明俱受賜感極涕泗垂溝壑
倘未填報國猶有時

次韻陳賀州題姜秦二公祠

姜丞相

姓名端合上麒麟當世那知相是真遺冢尚餘封馬鬣
孤忠曾記犯龍鱗三巴流落知音士

謂陸宣公

九日追陪避

世人精爽不迷祠宇復儼然唐室舊冠巾

秦隱君

去剡游閩避世喧清風寥邈典刑存峯前鳥宿無名樹
祠下僧敲有月門高尚端如上九疊含章更類六三坤
偏師勝後詩無敵正要公來與其論

來詩云安得
斯人與其論

薛士昭寄新柑分贈知宗提舶知宗有詩次韻

書後誰題字鄉人遠寄柑薦新思起孝知味戒生貪羅

帕分猶未金門獻正堪命名聊別偽

溫柑號
真柑

在果獨稱

甘

它果非無甘者惟柑子以甘得名言最甘也

白雪初盈樹黃金忽滿籃霜

天欣始熟茅舍飽相諧客重開須請兒癡食更婪柳詩
吟不厭謝賦讀常耽若蜜萍難比如拳栗有慙公家安
定法想見日酣酣

知宗柑詩用韻頗險予既和之復取所未用之
韻續賦一首三十韻

書閩揚州貢功觀禹化覃香苞分橘柚秋色動江潭

李德

裕枯賦動江潭之秋色

破暑花凝雪凌寒葉染藍金衣初日照

唐宰

相賀柑子表云綠蒂含烟金衣爛日

珠寶碧波涵

柳子厚詩何人摘實見垂珠

未上諸侯

計曾聞四皓談顏歡陸績母業世李衡男送客愈吟桂

韓退之送桂州嚴大夫詩云家自種黃柑

記時坡詠儋

東坡在儋耳詩一年好景君須記正是橙

黃枯洞庭夸浙右溫郡冠江南節物清霜重家山綠蒂

含青黃出籬落朱綠耀林嵐

柳子厚詩密林耀朱綠坡詩竹籬茅舍出青黃

昔貢千金顆遙馳萬里玉

宣政間溫州貢柑每顆有一二千

新宜薦寢

廟香可供瞿曇變子那能比羅浮未許叅

予住在夔府食黃柑味頗

佳然不及溫柑遠甚去冬至泉州始食羅浮柑又遠不及變子何人傳黃陸端類列非

聘在品寧為四

李直方第果實名柑子第四

蒙恩或賜三

李德裕賦序上賜宰

臣等朱桔各三枚

鄉情寄初熟
旅況憶幽探
嘉拜親開合
珍藏

淨洗甌

甌瓦器也新柑貯以瓦器則久而不爛

行將解印綬
浸種當田畓

根向橫陽覓

溫柑以平陽縣泥山為最

泥尋斤鹵檐

種柑宜鹵地

荒蕪耘

徑草封植伴溪枿
不用千頭富
聊資一餉湛
茅齋闕杜

甫仙井汲蘇耽

神仙蘇耽鑿井種桔

佳境妙食蔗閒庭勝詩甘

草也醫家謂之國老柳子厚詩詩藥閒庭延國老

雁行三峽荔奴視四明
柑欲

繼花為譜

歐公作牡丹譜

應同柳駐驂

歐公柳詩攀條莫惜駐征驂

禦偷籬

著棘愁凍灌添甘

柑米汁也鄉人冬月用以灌柑

掩映青雲葉光華碧

玉簪釀成浮甕蟻蒸辟蠹書蟬

柑桔花蒸以為香可辟衣書之蠹

護帶

期存乳

柑欲致遠必以蠟塗其帶

留皮欲去痰

皮能下氣醫家用以治痰

恨無親

可遺松慘白岩庵

林主簿明仲挽詞

齒德尊鄉黨曾中有古今箕裘傳蘊藻臧否判崔林呼

佛知仁政名軒見道心扁舟欲訪戴仙去不容尋

一箭雙雕手青衫已白頭硯幾磨鐵盡官止及瓜休漏

斷鄞江夢風含曲水愁

以上已
日亡

釣天記白玉塵世冷西

樓

假館城西日清談屢獲陪江湖倦游宦文字阻街孟方

嘆鸞栖棘俄驚鳳去臺

公與孺人
相繼而化

雪梅開舊舉無復寄

詩來

擬賦江南寄梅花詩

蔚宗居壠首陸凱在江南手折梅花寄人逢驛使堪吳
都尋半吐楚岸摘新含雪裏開纔一樓頭弄未三情深

殊折抑意重勝題柑溪上千株玉歸歟待自探

十月二十日買菊一株頗佳置于郡齋松竹之間目為歲寒三友

三百青錢一株菊移置窓前伴松竹鮮鮮正色傲霜性不逐重陽上醺醪誰云既晚何用好端似高人事幽獨南來何以慰淒涼有此歲寒三友足

重修北樓十一月望日與郡僚同登因書十二

韻

我昔未作南諸侯雄文嘗閱龍虎歐泉山風物得大畧
夢寐先已登茲樓到官正要訪遺迹忽見破屋城牆陬
欲修不敢遽土木經歲此志方能酬貢闈之餘材可辦
農事之隙工乃鳩月逢建子飛破鏡酒呼從事來青州
怱怱未暇衆賓集草草且與同僚游山川城郭壯哉郡
清源紫帽明雙眸却驚雲榭在地底坐見日轂經簷頭
西山端可挂頗視南海未用乘桴浮東瞻歸路興元亮
北望魏闕心子牟揮毫欲續仲宣賦假日聊以銷吾憂

諸公和詩復用前韻

歌眠聽詩韓喜侯鋒難與爭
劍鑄歐鈴齋淺陋無處著
掛在縹緲之飛樓茲樓久久詩
酒味天遣我輩來遐陬
塵埃聊用文字洗瓦礫
遂獲瓊瑶酬賓朋未賞台開燕
老病欲登宜杖鳩清風酌別記
雲水

湖州有清風樓

制勝領客

思夔州

夔州有制勝樓

一江明月楚東醉

饒州有鄒陽樓楚東閻范文正公詩云一

江明月夜歸遲

全家終日蓬萊遊

會稽有蓬萊閣子為幕客嘗挈家以游元微之詩云全家

終日在樓臺

南來不謂有此境四顧亦足窮
吾眸朝看日出

閩海嶠夜望斗插泉山頭端如號郡風月送

退之號州北樓詩

不比巴岳乾坤浮登臨懷古甫白適賦詠聯珠產羣牟
私心竊慕范文正後天下樂先其憂

哭萬先之

太學時名重吾鄉德譽崇才華盡天祿官職止儒宮
相國方知愈諸公競薦雄天涯忽聞訃老淚灑西風

胡邦衡以集英殿修撰知漳州正人起廢有識
相賀詩以志喜

左右同時兩舍人

隆興初某與
邦衡同立螭

莫年得郡偶為隣泉山

久著癡頑老漳浦新除正直人熱煥可能酬壯節炎州
聊復屈朱輪拾遺補過須公輩汲黯行歸侍紫宸

馮員仲復元官與致仕恩澤

謗猷久自熄果然天聽回孤忠昭聖代遺恨釋泉臺伏

節同元帥

符離師潰員仲興張魏公父
子存肝昭不肯去相約以死

知音有上台

員仲

與今左相同在魏公幕中
員仲被謗左相力為辯之

三軍氣應壯一洗向時哀

員仲

以論列罷三軍
嘆息有流涕者

次韻提舶見招

江梅初破一陽天
詩句清新欲鬪妍
呼我同來飲文字
定扶衰病到尊前

令人生日哭以小詩

二十七日

生日今重見細君
嗟不回竟孤偕老願
忍看舊時梅去歲
一盃酒遽然生死分
兒孫為壽地慟哭不堪聞

知宗生日

二十九日

昔年游越絕首識南枝梅
一麾守清源再見梅英開
顏

色宛如故風霜不能摧玉質長仙葩芳姿醞詩才其侶
乃蟠桃其根出蓬萊花開三十年壽薦三千盃

喻叔奇采坡詩一聯云今誰主文字公合把旌
旄為韻作十詩見寄某懼不敢和酬以四十

韻

斯文韓歐蘇千載三大老蘇門六君子如籍湜郊島大
匠具明眼一一經選考豈曰文乎哉蓋深於斯道諸公
既九原氣象日衰槁山不見泰華水但識行潦詞人巧

駢儷義理失探討書生蔽時文習氣未易澡著述豈無人紛紛謾華藻有如分裂時僭偽各城堡同年廣文君所作非小好高吟薄風雅古學窮渾灝讀史正承亥觀詩辨形天千篇冰玉清萬字波瀾浩心慕大手筆所恨生不早鄉令門及韓不類端可保賞識遇歐坡當為篋中寶聲名終不掩光豔姑自葆嗟我最不才兀兀首空皓半生槐踏黃晚景蓋張早出守屢及瓜還家僅嘗稻

去六月還家
九月赴泉山

田園荒洲明江梅客張鎬塵埃未能脫憂

患苦相惱愁儻卧蠶眉

相者謂予眉如外蠶主多愁苦

痛徹伏犀腦

近苦

頭疼

何當歸故山已書下下考鍾筆况久閣盧經徒獨抱

古文如金城偏師詎容擣小詩時自遣句法未知造廣

文賢關舊聲氣同濕燥食共朝齋辛案對夜螢薨策杖

游西湖尋梅插晴昊番有九十日呼酒羅脯棗潯陽三

年別心若風中蠹書來問安溫仍效世俗禱手寫十新

詩價重百礫礪情意何勤勤許與太草草那能把旌旄

但可供灑掃胡為以西子國色沉嫫媧前言蓋戲耳細

讀笑絕倒却將寄來詩錄附雅戲藁

叔奇嘗作雅戲集

題徐致政菊坡圖

名壽仁字子由

南方有高士仁義偃王喬家山闊幽坡手取香草蓺秋
至有黃華采采滿衣袂客來酒盈尊詩出語驚世無心
學淵明偶與淵明契靜者年自長頽齡不須制高懷耻
獨樂地遠人罕詣丹青寫佳境有目皆可睨吾家鮮鮮
徑荒蕪屢經歲儒冠誤此身掛之公得計

次韻吳明可見寄

閩楚相望天一涯思公不見見公詩遙知人在凝香處
正是梅逢驛使時紫帽清源游已倦落霞孤鶩看無期
它年杖屨天台去采藥尋桃薦壽卮

沈敦謨和詩見寄復用元韻

天使吾儕復會同笑談聲落酒筵中語離江北秋正杪
回首閩南歲又窮春草池邊來好句木奴皮裏隱仙翁
寄敦謨相將再上觀潮閣我已三章乞道宮

曹夢良教授寄柑一百顆報以乾荔支戲成二絕

故人書自許峯來領得黃相手自開未滿洞庭三百顆
更看驛使一枝梅

絕品知君尚未嘗三山絳帳喜相將冷官豈是淹賢地
尤物聊觀十八娘

懷夢齡昌齡弟

久別思吾弟它鄉歲又除日吟棠棣句目斷雁行書老
去情尤惡懷歸語似虛祠章已三上試為掃茅廬

臘月二十八日與知宗提舉分歲郡中啜茶于

北樓賞梅于忠獻堂知宗即席有詩次韻并

簡提舶

老病踰年卧晉江耽詩性癖未能降園林牢落梅經眼
歲月崢嶸酒蒲缸堂上焚香敬勲德樓頭回首念家鄉

黃柑未拜蕭嵩賜鄉味分珍謾一雙

時得溫柑
各分二顆

曾潮州到郡未幾首修韓文公廟次建貢闈可

謂知化本矣某因讀韓公別趙子詩用韻以寄

韓公學孔子不陋九夷居詆佛譏君王道大忠有餘南

遷八千里文墨以自娛至今潮陽人比屋皆詩書蓬茨
得趙子如獲滄海珠臨行贈以言恨不與之俱德如昌
黎公聖人之徒與比周孔孟軻不道遷相如韓公不可
見趙子今亦無潮人敬愛公百世祀不渝英姿入山骨
凜凜蒼眉鬚彼哉逢吉鏤金章褭猿狙使君藝且賢所
至政績殊下車首風教廟修庭草除又聞新棘闌輪奐
歸畫圖繼坡當有作大筆文辭驅惡詩願勿刻人方笑

其愚

潮州書六欲
刊某和韓詩

送柯教授赴官四明

士論鄉評總見欽古猶難得況于今耻干一介將行李
慨為孤身罄橐金晉水生徒懷絳帳賢闕故舊仰同襟

冷官豈足淹徊地未到鄞江有召音

教授赴官不以一事于州郡親友至

輒罄橐橐

寄崔甫之

懷州別駕生賢丁盤谷先生有外甥暫屈才能居筦庫

會看騰踏繼家聲

燭花

郡舍擁爐坐燭開連夜花主人無喜事應是報還家

次韻表叔賈元範見寄二首

華表飛來鶴姓丁鹿岩依舊故山青正緣松菊留仙隱

興國司理
聞至不起

肯為弓車到郡廳

王參政守永嘉招之不來

德者能言書

有力仁人自壽樂非靈

公平日不服藥壽考康寧

坐看世事公應笑

落水楊花萬點萍

記得公歸自汴京瞭然目為小生肯行能致遠由推轂

到即成渠荷建瓴松柏歲寒知節操芝蘭室邇化芬馨
白圭三復成陳迹感德傷懷涕泗零

某受知於公妻以兄女今有悼亡之

戚故

夫

人日喜晴

元日至人日幸無陰晦時因思董勛問却異少陵詩遙
想水坡凍坐看梅蒲枝明朝如得雨正與穀相宜

元宵貢院張燈會客知宗即席賦詩次韻

欲送羣英入帝鄉預燒燈燭趣仙裝銀花初合萬枝火

金榜已含千佛光出海靈龜駕蓬島逐人明月散天香
笙歌鼎沸吟篇出元白於詩魏未昌

是夕無即席
和者故云

送丁惠安

某假守溫陵獲觀七邑之政治行可稱者三四人然
未有出惠安之右者以嚴明為治而濟以廉平以撫
字為心催科不擾而辦每至郡必講論民間利病田
落海而稅不除官鬻鹽而民受害凡此類郡皆行之
民無訟牒犴獄屢空是宜邑人懷德繪像而祠之也

於其行也詩以送之

把麾平海看操刀惟我鄉人治最高但見武城人易使
不同梁竦職徒勞民懷其愛祠生立吏必如公責始逃
聞說朝廷考臧否僉言卓茂德宜褒

知宗示提舶贈新茶詩某未及和偶建守送到
小春分四餅因次其韻

建安分送建溪春驚起松堂午夢人盧老書中纔見面
范公碾畔忽飛塵十篇北苑詩無敵兩腋清風思有神

日鑄卧龍非不美賢如張禹想非真

坡詩其間絕品非不佳張禹縱賢非

胃鯁謂
茶草也

知宗贈驢肉以膳肉酬之

不駁於乘合見享

韓文不駁於乘謂驢也

鈴齋指動荷分美區區

膳肉非相報正恐公為孔子行

次韻贈新筍

候屆中和日漸長籜龍忽到愛松堂
便驚詩句含蔬味更覺庖厨有細香
未學坡公參玉版且同韓子賦簞簋

筍來茶往非為禮端為詩情故得嘗

曾潮州萬頃增闢貢院以元夕落成寄詩次韻

韓公來自九重天再見潮陽吏部賢

萬頃嘗為
天官郎

唾手渠

渠蜚夏屋揮毫混混寫源泉丹霄有月逢三五聖世生才
協半千太守落成應有語立朝名節看儒先

謂王尚
書元龜

題並玉堂

同年李伯時教授居泉之北門需次家食奉親有堂
前對朋山名曰並玉索詩為賦十韻

仙李門闌秀氣鍾二山朋盍玉為容晉人瀟灑坐連辟

杜老風流吟兩峯崑府烟霞浮几席藍田丘壑蘊心曾

俯容列岫葭相倚遙許它山石可攻光徹郛城翔白鷺

白鷺

影搖江水照黃龍

黃龍江

價高難把連城易官冷聊

將一穀供疑是璣衡臨處落端如日月合時逢主賓對

面成三友伯仲摩雲拱九重

李有難弟堂面北山

雁蕩浪誇鷺有

侶

雁蕩山有雙鷺峯

庾樓徒詫劍相從

廬山有雙劍峯庾樓對之

綵衣戲罷

看山色不似慈顏喜氣濃

出郊勸農飯疏于法石僧舍時方閔雨有無麥
之憂因成八絕

清源太守髯如蓬未遂歸農又勸農農事正興天不雨

誰能喚起老黃龍

郡城之西
有黃龍江

二麥青黃雨失時老農相顧但嗟咨使君徒用虛文勸
稼穡艱難未必知

我昔躬耕隴畝間也知農事最艱難才疎政拙心勞甚
無補於民合掛冠

賣刀買犢慕龔遂重穀務農思魯僖僚友共懷憂國願

守臣非皺職田畬

丘濬詩皺却首頭憂旱
滂一心只在賦田中

無術能銷旱魃灾吁嗟求雨只空回鰥生豈是為霖手

明日真人出洞來

晉江諸
蔡真人

萬歲名山兩度來精廬瀟灑絕塵埃禪師妙得兵家策

杖屨飄然去不回

謂長老
勤師

荔子今亡法石白

法石白見君
謨譜今無之

江山長帶佛頭青老僧

能說陳王事遺冢猶傳女子靈

陳王女葬法石
僧云時出靈響

一徑通幽亭面牆鳥啼林靜木蒼蒼碍人眼界宜介斧
放出山光接海光

食筍蕨

葉飛卿見贈作羹甚美因成是詩

犢角兒拳共作羹大勝五鼎八珍烹要須歸陟南山采

更看新移小竹生

先人嘗作蕨詩有陟彼南山采句厥伯貳詩云新移小竹已生筍皆家卿

故事

悼陳提刑

耆舊嗟零落南來識太丘有年兼有德無怨亦無求

公為監司郡守未嘗按吏居鄉不以事干州郡

清室遺風在新橋雅志酬誰知

燈火散身世隔明幽

元夕貢院張燈公為上客後十日而折

聞胡邦衡改知泉州復用前韻

上念溫陵為擇人知公名節世無隣
犯顏合在論思地起廢聊為岳牧臣
繆政居前誚稊稂剛腸別久轉車輪
天教我輩簪重盍只恐留中拱帝宸

次韻何興化德揚閔雨

熒惑照南紀千里生塵埃守臣失其職
閔雨腸空推奔

走佞佛老吁嗟禱風雷爍石勢愈熾望霓心可哀民情
有愁恨天意那能回緬懷端明公豈薄德與才乞雨問
山神胡為亦遜回鄰邦賢使君道妙藏靈臺不待雨催
詩却以詩篇催佇聽寫糟牀遙期銜賀孟政理陰陽和
誠加金石開餘波必及我飄灑桐城隈兩郡桐青青年
豐程崔嵬普天望作霖公盍歸乎來

喜雨再用前韻

南國久無雨渴心欲生埃麥既枯且死木亦黃而摧方

春雲已火未夏蚊成雷刺史固有罪斯民自宜哀真人
及人士久出應思回閉陽縱諸陰愧無董生才林鳩厭
呼喚石燕徒低徊有日上扶桑無雲起陽臺方修九淵
祀

初九日
欲祭龍

遽聞尺木催想驚阿香夢疑啖藥已盃夜中

簷溜響枕上愁顏開願徧普天下不止泉山隈莫作鼎

湖浪因風下崔嵬明朝賀雨詩定自蒲中來

唐人賦仙
都詩黃帝

旌幢去不回片雲孤石獨崔嵬有
時風學鼎湖浪散作晴天雨點來

次韻龔實之正言見寄

堂堂人物冠清流不減當年宋廣州持節分符聊爾耳
直尋枉尺斷還不初開宣室漢思賈欲復侵疆魯召丘
整頓乾坤趁頭黑早須歸伴赤松遊

諫坡烏府迹相望眼底何曾識六郎去國雅欽龔勝節
得州欣近鄭公鄉尺書遠荷鴻傳至好句惟憂電取將
未見紫芝人已說天庭喜氣十分黃

出郊近客至石塔院憇劉公亭觀石筍橋東望
郡城南瞻紫帽即事有作

春日西郊外江亭眼界嘉青桐映樓閣紫帽沒烟霞雨
過牛耕野潮回鷺立沙河梁阻携手空起逝川嗟

用喜雨韻呈龔實之

請雨徧羣望擾擾衝塵埃際天麥浪空刺水秧針摧已
近尺五天未動滿盈雷地欲赤晉國年將饑魯哀寄牋
叩天門好音清夜回似傳上帝意頗亦憐不才披衣起

視月在畢方徘徊忽聞蕭蕭聲高灑熙熙臺

郡園舊有熙熙臺見

應源志或云即雲榭也

雲陣潑墨暗電光搖幟帷燈前落簷花欣

街少陵孟綠波滿四澤花柳村村開知有一尺霖來從

傳岩隈

微廟書商霖一尺四字賜張無盡正言到郡之久雷雨大作

不作天寶詞淋

鈴悲馬寬定有元和詩中街諫書來

石筍橋

清源郡城之西有渡名石筍溪與江會險而深涉者
病之初浮木為梁屢修屢壞議更以石費重而役難
時提刑陳君慨然為之倡弟賀州叶具謀今樞密梁
公力助之經始於紹興庚辰訖工於乾道己丑提刑

屢約予觀未果明年春三月辛酉迓客出郊過而壯之
因記以詩

刺桐為城石為筍萬壑西來流不盡黃龍窟宅占上游
呼吸風濤勢湍緊怒潮拍岸鳴霹靂滄溟天沒畦畛
行人欲渡無翼飛魚腹蛟涎吁可閔二三大士為時出
目覩狂瀾心不忍小試閒居濟川手遠水孤舟寇忠愍
亦有山僧願力深

僧文繪等
董其役

解使邦人指倉囷五丁挽

石投浩渺萬指碌山登嶷嶭辛勤填海效精衛突兀橫

空飛海蜃趾牢千尺鮫人室護以兩旁獅子楯南通百
粵北三吳擔負輿肩走駟北論功不減商舟楫遺利宜
書漢平準莫將風月比揚州二十四橋真蠢蠢我時出
郊春雨後鷺點沙汀颺鷹隼江亭矯首獨遐觀有客南
來盃共引

是日過關
之少憩江亭

欲詠河梁擬蘇李頗類鑑湖逢

鞏稔江山不逢賢太守袖手沉吟覺才窘况無鐵筆擬
端明徒使時人笑蚯蚓綉衣屢約吾來遊未遂堪嗟德
星隕鄉來嘗以記屬我固避牢辭慙不敏傳聞江欲飛

棟初異論紛紛互矛盾世無剛者橋豈成名與萬安同
不泯

林黃中少卿出守吳興芮國器司業以詩送之
有今日桐城王刺史異時遺愛在吾州句用韻
寄二公

出處平時正且嚴猶於瓜李謹嫌疑兩溪水照新明月

郡有明月樓

六客堂逢舊紫髯

孫莘老美髯髯嘗守吳興東坡寄以詩云好在紫帽翁黃

中亦美髯故云

安定化應孚學校謝公思已結閭闔湖山清遠

使君好想見邦人慰所瞻

賢關今日陽司業家在白蘋溪上州筆下波瀾含震澤
胸中意氣屬清流弁山疊拜南金贈泉嶺遠蒙明月投
老矣惟公獨青眼一言褒借勝封侯

題蔣元肅蘊仁堂


人孰無父母圖報良亦難忽興風樹悲莫盡叔水歡君
羹不易嘗而况榮以官向來蔣令君

堂乃宰德
化時作

慶具顏

方丹手折東堂桂口詠南陔蘭生封拜君命戲彩慈溫

顏教之由義方蘊之在仁端仁熟椿亦老親榮心始安
堂在人事非思親誠益殫已足廣文飯方殫貢公冠願
移前日孝要作忠臣看



梅溪後集卷十九